

## NOTA DE PRENSA

### CCOO DENUNCIA LA DEMORA NEL INXERTU DE LA LLINGUA ASTURIANA N'EDUCACIÓN INFANTIL Y PIDE LA XENERALIZACIÓN DE LA UFIERTA DE L'ASIGNATURA NESTA ETAPA

Depués de facer la Conseyería d'Educación y Cultura delles anuncios sobre l'inxertu de la enseñanza del asturianu n'Educación Infantil, el Sindicatu d'Enseñanza de CCOO Asturias detectó apocayá un importante parón nel procesu. A finales del cursu pasáu, la Conseyería declaró la so intención de camudar el Decretu de currículu del segundu ciclu d'Educación Infantil, iguando los procedimientos necesarios pa que los especialistas d'Educación Primaria pudieran dar clase de Llingua tamién nesa etapa. En payares de 2017, fízose pública una propuesta de camudamientu curricular que prevía l'inxertu de conteníos d'asturianu, que l'alumnáu podría cursar de forma voluntaria, nel área de *Llinguaxes: Comunicación y Representación*. Esta propuesta inda nun se promulgó nel BOPA, magar que'l plazu de prematrícula nos centros educativos yá empezó, polo qu'hai que suponer que nun se va executar como taba anuncio.

Estos fechos tán causando gran decepción ente'l profesoráu de Llingua Asturiana, na medida en que nun se cumplen les expectatives creaes pola propia Conseyería d'Educación. El 26 de febreru de 2018, nuna xunta caltenida col Secretariu Xeneral d'Enseñanza de CCOO, el Director Xeneral de Planificación Llingüística espresó la so intención d'inxertar l'aprendizaxe de conteníos d'asturianu nes propuestes curriculares d'Educación Infantil "de forma progresiva" a partir del cursu 2018/2019. Los oxetivos inmediatos yeren regularizar la situación de los centros educativos onde se tán impartiendo estos conteníos de forma experimental ampliando, al mesmu tiempu, la ufierta a centros nuevos.

La esclusión de la enseñanza del asturianu na Educación Infantil constituye un incumplimientu de la Llei 1/1998, de 23 de marzu, d'Usu y Promoción del bable/asturianu, que determina nel so artículu 9 que'l Principáu d'Asturies ha asegurar l'enseñu d'esta llingua en tola enseñanza reglada. Pa CCOO, la única actuación llexítima en rrellación con esti asuntu ye xeneralizar la ufierta voluntaria de conteníos d'asturianu y gallegoasturianu nel segundu ciclu d'Educación Infantil.

**Sindicato de Enseñanza CCOO Asturias**

C/ Santa Teresa 15, 1º (33005) OVIEDO Teléfono: 985 25 71 99

<http://www.fe.ccoo.es/ensenanzaasturias/> e-mail: [feasturias@fe.ccoo.es](mailto:feasturias@fe.ccoo.es)